

09. februar 2016

UPA 2016/69

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

Inissianik attartortitsisarneq pillugu Inatsisartut peqqussutaata nr. 2, 12. maj 2005-meersup UPA 2017-mi allanngortinneqarnissaa pillugu Naalakkersuisut suliniuteqaqqullugit inatsisartut aalajangiiffigisassaattut siunnersuut.

Taamaaliornikkut atorfirmut atatillugu inigisap sivikinnerpaamik ukiuni tallimani attartoreerneratigut attartortup nalinginnaasumik attartukkatut inigilersinnaaqqullugu.

(Inatsisartunut ilaasortaq Anthon Frederiksen, Partii Naleraq).

Tunngavilersuut:

Pisortat inissiaataanni najugaqartut aamma atorfirmut atatillugu inissiamik attartortittakkamik nalinginnaasumik neqeroorfigineqarsimasut peqqussut qulaani taaneqartoq naapertorlugu minnerpaamik ukiuni kingullerni arfineq marlunni najugaqarsimagunik, najugaq inissiatut nalinginnaasumik attartortittakkatut tigusinnaavaat. Soorlu peqqussummi paragraf 21, imm. 2 ima allaqqasoqartoq:

"§ 21. *Imm. 2.* Attartortoq ukiuni kingullerni arfineq marlunni sulisunut inissiami najugaqarsimasoq pisinnaatitaavoq sulisunut inissiaq najukkani inissiatut nalinginnaasumik attartortittakkatut tigussallugu".

Atorfillit qulaani taaneqartut najugaqarnermikkut kiffaanngissuseqarnerunissaat, minnerunngitsumillu aamma atorfillit ilaasa kissaateqarnerat naapertorlugu minnerpaamik ukiuni kingullerni arfineq marlunni atorfirmut atatillugu inigisami najugaqarsimanissamik piumasaqaatip minnerpaamik ukiunut tallimanut appartinneqarnissaa matumuuna siunnersuutingaara.

Siunnersuut ilaatigut atorfillit atorfirmut allamut nuussinnaaneranngut eqaannerusumik periarfissiissooq, tassa inissiap atorfirmut atatillugu pissarsiarineqarsimasup, inissiatut nalinginnaasumik attartortittakkatut inissisimalernerata tamanna ajornarunnaasissammagu.

Taamaammat neriuppunga inatsisartut siunnersuut isumatuumik isummorsorfigilluarumaaraat.

Siunnersuutip allaffissornikkut aningaasatigullu kingunerisinnaasai:

Naatsorsuutigineqarsinnaavoq siunnersuutip allaffissornikkut aningaasatigullu kingunerisinnaasai AC fuldmægtigitut atorfillip ataatsip ukiup 1/12 akissarsiassaasa nalingisinnaanga, taakkualu aningaasaliissutit pioreersut iluini naammassineqarsinnaasut.

Ukiut arfineq marluk atuuttussanngortinneqarnerannut atatillugu taamanikkut naalaakkersuisut oqaatingaat, siunnersuut aningaasaqarnikkut, allaffissornikkullu, innuttaasunut, pisortanut namminesortunullu sunniuteqarnerlussanngitsoq. Tamatuma saniatigut taamani Naalakkersuisuusut aamma oqaatigaat, atorfillip inissiaq najukkani tigummiinnarniarlugu aalajangernerata pitsaaqutigissagaa, inissiamut init amerlaqataannik initalimmut nuuttariaqannginnera. Sulisup pisinnaatitaaffianit sulisunut inissianut imaluunniit inissianut attartortittakkanut nalinginnaasunut inissarsiortut allattorsimaffianni allatsissimasut allat sunniuteqarfigineqassanngitsut, sulisunut inissiamut taarsiullugu inissiaq attartortittagaq nalinginnaasooq neqeroorutigineqartoq peerneqartussaammat. Sulisoq inissiamut attartortittakkamut nalinginnaasumut neqeroorutigineqartumut nuunnissaminut taarsiullugu sulisunut inissiaq najuinnarniarlugu aalajangerpat, inissiamut normu sulisup sulisitsisuata pigisaa atornerutissasoq, taannalu atorlugu sulisunut inissiamik allamik inniminniisoqarsinnaavoq.

Ukiunik arfineq marlunniik ukiunut tallimanut allanngortitsineq inuiaqatigiinnut allaffissornikkut aningaasaqarnikkullu ajortumik kinguneqassangatinneqanngilaq.